

EDITỌŃỌ NTAK NDI JESUS

Luke 12:35-57

ỌYỌHỌ UKPEP-ŃKPỌ 45

Eke Mkparawa

IKỌ IBUOT: “Se ndọhọde mbufo, mmonyuñ ndọhọ kpukpru owo nte, Ekpeme” (Mark 13:37).

Ńwan Ndọ Christ

Ibighikebigi usen kiet Ọbọñ nnyin eyeto ke enyọñ edi ndikot Ńwan Ndọ Esie ñka Usọrọ Ndọ emi edidade itie ke ikpa enyọñ. Ńwan ndọ oro edidi mmọ oro etode ufọk-Abasi Ikpan emi ema ekebeñe idem mmọ enim enọ akwa ñkpọ-ntibe oro. Ńwed Abasi etiñ ata iñwañ-iñwañ se oro enyenede ndinam man oto do ebat enye esin ke otu mmọ emi ekande emi edidokde mfefere mfefere ekesobo ye Ọdọ-ndọ. Edi mmem-mmem ọnọ kpukpru owo nditiene mbuana.

Baba owo kiet idikopke ikot Usọrọ ndọ oro ibọhọke mmọ emi ebeñede idem, mmọ emi “ekenyuñ eyetde ofọñ-idem mmọ enam afia ke iyip Eyen-erọñ.” Mme idiok owo eyedu ke mkpaidem ke ini editañde nti Ikọt Abasi ifep ke ediyip enyin. Jesus ekeme ndidi ndida Ńwan Ndọ Esie ini kiet ekededi idahaemi, edi mmọ emi enamde mbeñidem edi ata ekpri ibat. Ke ukpep-ñkpọ mfin, Jesus ama etiñ ọnọ mbet Esie ete edieke enyene ufọk ọkpọfiokde ini eke inọ edidide enye ekpebeñe idem ikponyuñ iyakke ebuñ ufọk esie eduk. Jesus ọnọ nnyin ntọt ete, Imọ ididi nte inọ ke okoneyo (1 Ńwed Thessalonica 5:2), ntre nnyin inyene ndibeñe idem kpukpru ini.

Ndisaña Ye Abasi

Man enam mbeñeidem ke abaña eridi Jesus, owo inyeneke ndibọ suk erinyaña ukpọñ; oro edi edifen ke mme idiok-ñkpọ, me edinam asana, oro edi ediyet asana oto ke ọyọhọ utom mfọn iba; ye mbuotidem Edisana Spirit; ofọñidem ndọ ikpọñ-ikpọñ; edi enye enyene ndisaña ñkpere Abasi kpukpru ini nte emi Enoch akanamde. Ema emen Enoch ebe eduk heaven ye uwem, ukem nte edinamde ye Ńwan Ndọ Christ emi edisuk idude uwem ke ini Enye editọñde ntak edi.

Nnyin inyene nditim nsaña ñkpere Abasi man utom ye kpukpru edinam nnyin ye idem edu uwem nnyin eda nnyin osim eridi Ọbọñ. Edieke nnyin idide ndebe ke ñkpọ nte ibat ñkanika kiet ndien Jesus edi ke utọ ini oro, iyetaba kpukpru ñkpọ. Jesus oyom ikọt Esie ekpeme kpukpru ini ebet eritọñ ntak ndi Esie. Se nte enyenede ndik ndikere nte kpukpru nditọ Abasi ke ufọk mbufo esopde ndien afo ọsuhọ ikpọñ ndibuana ke akwa ukut. Da utọ idiok ini oro domo ye ubọñ edimen ndok ke ofim mkpọñ kpukpru afanikọñ ye ukut ke isọñ.

Emen Enyọñ Ye Jesus

Jesus eyeyarare idem ikaba ke ini Enye editọñde ntak edi: akpa Enye eyedi ke ofim ke enyọñ ndien nte akwa magnet Enye eyeduri ikọt Esie emi edide mme andikan ọnọ Idem Esie. Enyene ndik akwa ukut ke edi ke isọñ, ini afanikọñ, utọ nte akananam miduhe, ndien Abasi iyomke nditọ Esie ekut ukut. Oro edi ntak emi Enye edidide nditañ ndisana Ikọt Esie ndok. Enye eyedohọ ete: “Ikọt mi, mbufo eka ekeduk ke mme ubet mbufo, enyuñ eberi itim mbufo ebaha idem mbufo: edibe ini esisit ntem, tutu ikpaha-esit ebe” (Isaiah 26:20). Ńwan-ndọ Christ eyebe oduk ke ubet enyọñ onyuñ ọsuhọ etie ke Usọrọ Ndọ Eyen Erọñ (emi edide Jesus), ndien Jesus ke Idemesie eyedinam ñkpọ ọnọ mmọ. Ndien eyenọ utip kpukpru nti utom emi mmọ ekenamde mi ke isọñ. Nte ididighe utibe-ñkpọ ndidu ke utọ usọrọ oro ye Jesus?

“Eyak Nnyin Idara Inyuñ Idat Esit”

Edidi ata ini idaresit ọnọ nditọ Abasi ke ini Ebe Ndọ ukpọñ mmọ edidide ndida mmọ. Ke ini John Edima okodude ke Isuo Patmos, enye ama okut ñkukut se iditibede ke ini iso ndien enye ewet: “Eyak nnyin idara inyuñ idaresit, inyuñ inọ Enye ubọñ; koro ekem ini ndọ “Eyen-erọñ, Ńwan Esie otim idem ebeñe Enye.

“Enyuñ enọ enye ndisine ediye linen eke asanade onyuñ esemde; koro ediye linen oro edi edinen ido nti ikọt Abasi.

“Angel onyuñ ọdohọ mi ete, Ọfọfọn ọnọ mmọ emi ekekotde edi udia ndo Eyen-erọñ” (Eriyarare 19:7-9).

Mmọ emi ekekpānade nte mme andikan eyenyene udeme ke akwa edinam emi. “Koro Ọbọñ ke Idem Esie eyeto ke heaven ọsuhọ ye mkpọ ye uyo archangel, ye ukorowo Abasi; ndien mmọ emi ekpānade ke Christ eyebem iso eset: ndien eyemen nnyin emi idude uwem emi isuhọde, edok ye mmọ ke ikpa-enyọñ, man isobo ye Ọbọñ ke enyọñ: (1 Ńwed Thessalonica 4:16, 17).

Eriyarare

Ke ema emen Nwan-Ndọ Christ esio ke ererimbot, ata akwa ukut eyedu. Nwan-Ndọ edidu ke idara ke usoro ndọ ke ini mmọ emi ekesinde ndibeñe idem mbet eridi Qbọñ edikutde ukut ke idak ukara Asua Christ.

Utiti ini Usoro Ndọ edinyuñ idi utiti ini akwa ukut. Ndien Jesus eyetoño ntak edi, ini emi ye ndisana ikot Esie, ndien “kpukpru enyin eyenyuñ ekut Enye, ye mmọ emi ekekimde Enye; ndien kpukpru mme idut isoñ eyeseme Enye” (Eriyarare 1:7). Mmọ eyeseme koro mmọ efehede ndik ndisobo ye Jesus ke ubiere-ikpe.

Emi edi ini emi Enoch eketiñde ntiñ-nnim ikọ abaña ete, “Sese, Qbọñ asaña ye ata ediwak ndisana ikot Esie edi, Ndikpe ikpe ye kpukpru owo” (Nwed Jude 14, 15). Mmọ eyewat ke mfia enań mbakara koro nnyin ikot ke Eriyarare 19:14 ete “Ndien udim ekọñ emi edude ke heaven edoro ke mfia enań-mbakara etiene Enye (Jesus) ke edem, mmọ esine ediye linen emi afiade onyuñ asanade.” Nte emekeme ndikere mbaña utọ ndise oro? Jesus ke Idemesie eyedi ke afia enań-mbakara, edi edikara ererimbot ke esań ukwak, enyuñ ewet enyiń ke ifuhi Esie ete, EDIDEM NDIDEM YE QBỌÑ MBỌÑ; ndien kpukpru ndisana owo emi ekedude ke Usoro Ndọ eyetiene Enye ke edem enyuñ ewat ke mfia enań-mbakara. Mmọ eyetiene ebuana ke ndikara ererimbot. Jesus ama ọdọhọ ete, ndusuk eyekara obio kiet, ndusuk iba, ndusuk ition, ndusuk obio duop.

Ukara Ke Tọsin Isua

Christ eyewut obio ubọñ ke isoñ, ndien uwem eyesuk aka iso nte esidide ibọhọke kpukpru nkpo eyesuk idem enọ Christ. Eyemen isuńi efep, ndien kpukpru mme eto ye mbiet eyekabare enyene obufa uyai. Edidi utibe ererimbot ndiduń ke esit. Ndisana owo emi esetde eyenyene ikpohidem ubọñ nte emi Jesus ekenyenede ke ini Enye ama ekeset ke mkpa, koro Enye ekedide “akpa mbuńwum;” ke oro ebete, mmọ emi edide ikot Christ ke eridi Esie (1 Nwed Corinth 15:23). Enye ama ekeme ndidia nnyuñ nńwọñ ke ini Enye okodude ke ikpohidem ubọñ, onyuñ ekeme ndibe ke mme ebiet ndien owo ikwe Enye, onyuñ ekeme ndibe nduk ke ufọk emi ema ekeberi usuń nnyuñ nda ke ufot ikot Esie. “Adańoro ndinen owo eyeyama nte utin ke Obio Ubọñ Ete mmọ” (Matthew 13:43).

Ntre nnyin ikut ite ke editoño ntak ndi Qbọñ edidi ke ikpehe iba: akpa ini edidi ke ofum ke enyoń **Ndida** Nwan-Ndọ Esie ke ini Ntań-ndọk, ọyọhọ ikaba, Enye eyesuhọre edi ke isoñ ye Nwan-Ndọ Esie ndien ukot Esie eyedoro ke ukem Obot Olive emi Enye akadahade ọdọk ke enyoń (Zechariah 14:4, 5). Ke ini Ntań-ndọk ndisana Ikot Abasi ikpọñ edikop ikot Esie, edi ke **Eriyarade Idem** “kpukpru enyin eyenyuñ ekut Enye.” Ntań-ndọk eyeda itie mbem iso akwa ukut, ndien Eriyarade Idem; eyeda itie ke akpatre ini akwa ukut. Ntań-ndọk ekeme ndida itie ini ekededi. “Mmọdo mbufo nde ebeñe idem; koro ke ini eke mbufo midorike enyin, Eyen Owo eyedi” (Matthew 24:44).

MME MBUME

- 1 Nso idi Ntań-ndọk?
- 2 Mme anie edidọk ke ini Ntań-ndọk?
- 3 Eda Qbọñ edomo ye anie ke ini Ntań-ndọk? Eda Ufọk Abasi edomo ye anie?
- 4 Nso iditibe ye ndisana Ikọ Abasi ke ini akwa ukut?
- 5 Mme anie edidu ye Jesus ke ini Enye edidide ndikara ke isoñ? Tiń baña nte eridi mmọ editiede?
- 6 Nte afo eyedara ndikut Jesus?